



## SIARAN MEDIA

### MED KOMITED MEMACU PERKEMBANGAN PKS NEGARA

---

**PUTRAJAYA, 7 Januari 2020** - Kementerian Pembangunan Usahawan (MED) dan agensi-agensi di bawahnya termasuk SME Corporation Malaysia terus komited untuk memudahcara dan membantu usahawan-usahawan PKS secara langsung dan tidak langsung dalam memacu perkembangan PKS negara.

PKS negara sudah berada di atas asas yang kukuh untuk bergerak ke hadapan dan tahun 2020 memberikan ruang serta peluang terbaik untuk PKS menjangkau prestasi yang lebih daripada pencapaian sebelum ini.

Berdasarkan unjuran yang diumumkan semasa Belanjawan 2020, ekonomi Malaysia dianggarkan berkembang pada 4.7% pada 2019 dan sedikit meningkat kepada 4.8% pada tahun 2020. PKS juga dijangka mendapat manfaat daripada Belanjawan 2020 yang memperuntukkan sejumlah RM13.1 bilion sebagai langkah-langkah untuk merangsang pertumbuhan ekonomi dan memberi manfaat kepada perniagaan dan usahawan.

Perolehan kerajaan juga akan memberikan keutamaan kepada sumber barangan yang dibuat oleh PKS Malaysia sempena penganjuran mesyuarat dan program Kerjasama Ekonomi Asia Pasifik (APEC) 2020 di sepanjang tahun ini. Penganjuran APEC 2020 juga dijangka akan membuka peluang kepada Malaysia untuk meningkatkan aktiviti

pelancongan, sejajar dengan Tahun Melawat Malaysia 2020, di mana PKS akan mendapat manfaat secara langsung dan tidak langsung.

Dari perspektif yang lebih besar, PKS perlu meraih sepenuhnya manfaat digitalisasi dan teknologi terkini yang membolehkan transformasi proses perniagaan dilaksanakan dengan lebih berkesan.

Sejajar dengan aspirasi DKN2030 dan peri pentingnya merasakan denyut nadi PKS negara, SME Corporation Malaysia sebagai agensi yang mengkoordinasi agenda PKS bagi Kementerian Pembangunan Usahawan akan menganjurkan satu sesi YB Menteri Pembangunan Usahawan Bersama PKS pada 21 Januari 2020 sebagai satu saluran untuk mendapatkan maklumbalas dan komen mengenai program-program pembangunan PKS negara. Sesi ini akan memberi peluang PKS untuk berdialog dengan Menteri Pembangunan Usahawan. Justeru, PKS dijemput menghubungi SME Corp. Malaysia untuk menempah tempat dalam sesi tersebut.

Selamat Tahun Baru 2020. Semoga hubungan yang erat di antara PKS dan Kementerian Pembangunan Usahawan akan terus terjalin bagi memastikan pertumbuhan ekonomi yang mapan dan negara yang makmur dapat dicapai selaras dengan Dasar Keusahawanan Nasional (DKN2030) dan Wawasan Kemakmuran Bersama 2030 (WKB2030).

Untuk maklumat lanjut, sila hubungi Puan Fadhlia Abdul Satar 03-27756045 atau email :fadhlia@smecorp.gov.my atau Puan Nor Azian Md Yusof 03-27756174 atau email :azian@smecorp.gov.my

**Kementerian Pembangunan Usahawan**

**7 Januari 2020**